

UPA2026/112: Kalaallit Nunaanni mittarfinnut nunanut tamalaanut atorineqartunut tamanut kalaallit erfalasuaata qaqqineqartarnissaa qulakkeerneqassasoq pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Lars Poulsen, Siumut)

Akissuteqaat

(Naalakkersuisut Siulittaasuut)

Siullermeerineq

Inatsisartunut ilaasortaq Lars Poulsenip, Siumut, siunnersuuteqarneranut Naalakkersuisut qutsavigiumavaat.

Kalaallit Nunaanni nunat tamalaat akornanni mittarfiit takornarissanut, inuussutissarsiornermut atatillugu angalasunut kiisalu pisortatigoortumik aallartitanut nunanut isaavittut atormata, Kalaallit Nunaanni nunat tamalaat akornanni Erfalasutta amuneqartarnissaa qulakkiissallugu aalajangiiffigisassatut siunnersuutip siunertaraa.

Kalaallit Nunaata erfalasua, Erfalatorput, nunap ilisarnaatigimmagu pingaarutilik, Kalaallit Nunaannilu kulturimut, oqaluttuarisaanermut, Namminersornerullutik Oqartussaqaarnermut ilisarnaataassammat Naalakkersuisut siunnersuuteqartumut isumaqataapput. Tamanna pillugu Erfalasutta Kalaallit Nunaanni nunat tamalaat akornanni mittarfinni amuneqartarnissaa Naalakkersuisut kissaatigaat.

Taakkua oqaatigalugit Naalakkersuisut allannguutissatut siunnersuutip akuerineqarnissa inassutigaat.